

T 2611

8243

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

廿二
三
X

列傳第四十六

通志一百三十三

宋

王誕 兄子偃
偃子藻

王華 字敬
孔審子

王惠 從父弟球

王或 子絢
兄子蕞

王裕之

王鎮之 弟弘之
子曇生
阮萬齡

王韶之

王悅之

王准之 族子素

王懿 兄孫文和

到彥之

垣護之

張興世

袁湛 弟豹
豹孫顛



孔靖

子靈符 靈符子深之

孔琳之

孫顛

殷景仁

從弟淳 淳弟冲

淳子孚 冲弟淡

孚子臻

王誕字茂世琅邪臨沂人太保弘從祖兄也祖恬晉中
 軍將軍父混太常卿誕少有才藻晉孝武帝崩從叔尚
 書令珣為哀策文久而未就謂誕曰猶恨少序節物一
 句因出本示之誕攬筆便益之接其秋冬代變後云霜
 繁廣除風迴高殿珣嗟歎其清拔因而用之襲爵雒鄉
 侯會稽王世子元顯開府以誕為功曹累遷後軍長史
 琅邪內史誕結事元顯嬖人張法順故為元顯所寵元

顯納妾誕為之親迎隨府轉驃騎長史內史如故元顯
 討桓玄欲悉誅桓氏誕固陳桓脩等與玄志趣不同遂
 得免脩誕甥也及玄得志誕將見誅脩為之陳請得徙
 廣州盧循據廣州以誕為其平南長史甚賓禮之誕久
 客思歸乃說循曰被蒙殊眷士感知已實思報荅下官
 與劉鎮軍情味不淺若得北歸必蒙任寄公私際會思
 報厚恩循然之時廣州刺史吳隱之亦為循所留誕又
 曰將軍今留吳公竊謂將軍非計也昔孫伯符豈不欲
 留華子魚但以一境不容二君耳於是誕及隱之並得

還武帝請爲太尉諮議參軍盡心歸奉日夜不懈帝甚
委仗之盧循自蔡洲南走劉毅固求追討帝持疑未決
誕密白曰公旣平廣固復滅盧循則功蓋終古勲無與
二如此大威豈可使餘人分之毅與公同起布衣一時
相推耳今旣已喪敗不宜復使立功武帝納其說七年
遷吳國內史以母憂去職武帝伐劉毅起爲輔國將軍
誕固辭以墨纒從行時諸葛長民掌留府事心不自安
高祖甚慮之毅旣平誕求先下帝曰長民似有自疑心
卿詎宜便去誕曰長民知下官蒙公垂眄今輕身單下

必當以爲無虞可少安其意帝笑曰卿勇過賁育矣於
是先還九年卒後追封作唐縣五等侯子詡早卒誕兄
嘏字偉世侍中左戶尚書始興公嘏子偃字子游母晉
孝武帝女鄱陽公主宋受禪封永成君偃尚武帝第二
女吳興長公主諱榮男常傑偃縛諸庭樹時天夜雪噤
凍久之偃兄恢排閣詬主乃免偃謙虛恭謹不以世事
關懷位右光祿大夫贈開府儀同三司謚恭公長子藻
位東陽太守尚文帝第六女臨川長公主諱英媛公主
性妬而藻別愛左右人吳崇祖景和中主讒之於廢帝

藻下獄死主與王氏離昏宋世諸主莫不嚴妬明帝每疾之湖熟令袁愔妻以妬賜死使近臣虞通之撰妬婦記左光祿大夫江湛孫敷當尚孝武帝女上乃使人爲敷作表讓婚首叙晉氏以來配尚王姬者雖累經美曹亟有才名至如王敦懾氣桓溫斂威真長佯愚以求免于敬炙足以違禍王偃無仲都之質而保雪於北階何瑀闕龍工之姿而投軀於深井謝莊殆自害於矇叟毅仲幾不免於彊鉏爰及王藻戲笑遂爲寃魂褚曖憂憤橫致夭絕其言驕妬之狀曲盡形容上因以其表遍示諸主用諷切之并爲戲笑元徽中臨川王表求還身王族守養弱嗣許之藻弟懋字昌業位光祿大夫封南鄉侯懋子瑩梁史有傳

王華字子陵輔國將軍誕從祖弟也祖蒼衛將軍會稽內史父敷司徒右長史晉安帝隆安初王恭起兵討王國寶時敷丁母憂在家恭檄令起兵敷即聚衆應之以女爲貞烈將軍以女人爲官屬及國寶死恭檄敷罷兵敷起兵之際多所誅戮至是不復得已因舉兵以討恭爲名恭遣劉牢之擊敷敷敗走不知所在長子泰爲恭

所殺華時年十三在軍中與蘇相失隨沙門釋曇冰逃
使提衣襍從後津邏咸疑焉華行遲曇冰罵曰奴子怠
懈行不及我以杖捶華數十衆乃不疑由此得免遇赦
還吳少有志行以父存沒不測布衣蔬食不交遊如此
者十餘年爲時人所稱美武帝欲收其才用乃發廩喪
問使華制服服闋武帝北伐長安領鎮西將軍北徐州
刺史辟華爲州主簿後爲別駕歷職著稱文帝鎮江陵
以爲西中郎主簿諮議參軍文帝未親政事悉委司馬
張邵華性尚物不欲人在已前邵性豪侈每行來常引

夾轂華出入乘牽車從者不過兩三人以矯之嘗相洛
華陽若不知是邵謂左右曰此鹵簿甚盛必是殿下乃
下牽車立於道側及邵至乃驚邵白服登城爲華所糾
邵坐被徵華代爲司馬文帝將入奉大統以少帝見害
不敢下華曰先帝有大功於天下四海所服雖嗣王不
網人望未改徐羨之中才寒士傅亮布衣諸生非有晉
宣帝王大將軍之心明矣獨畏廬陵嚴斷將來必不自
容殿下寬赦慈仁天下所知且越次奉迎冀以見德悠
悠之論殆必不然羨之亮謝晦又要檀道濟王弘五人同

功勢均體敵莫肯相讓脫有異論勢必不行今日就徵
萬無所慮文帝從之曰卿復爲吾之宋昌矣乃留華總
後任上即位以華爲侍中領右衛將軍先是會稽孔甯
子爲文帝鎮西諮議參軍以文義見賞至是爲黃門侍
郎領步兵校尉甯子先爲何無忌安成國侍郎還東脩
宅令門可容高蓋隣里笑之甯子曰大丈夫何常之有
甯子與華並有富貴之願自羨之等執權日夜構之於
帝甯子嘗東歸至金昌亭左右欲泊船甯子命去之曰
此弒君亭不可泊也華每閉居諷詠嘗誦王粲登樓賦

曰冀王道之一平假高衢而騁力出入逢羨之等每切
齒憤咤歎曰當見太平時否元嘉二年甯子卒三年誅
羨之等華遷護軍將軍侍中如故宋世唯華與南陽劉
湛不爲飾讓得官即拜以此爲常華以情事異人未嘗
預宴集終身不飲酒有宴不之詣若有論事者乘車造
門主人出車就之及王弘輔政而弘弟曇首爲文帝所
任與華相埒華嘗謂己力用不盡每歎曰宰相頓有數
人天下何由得治四年卒時年四十三九年以誅羨之
功追封新建縣侯謚曰宣孝武即位配饗文帝廟庭子

定侯嗣卒子長嗣坐罵母奪爵以長弟佟紹封齊受禪
國除

王惠字令明誕從祖弟也祖劭車騎將軍父默左光祿
大夫惠幼而夷簡為叔父司徒謚所知恬靜不交遊未
嘗有雜事陳郡謝瞻才辯有風氣嘗與兄弟羣從造惠
談論鋒起文史間發惠時相酬應言清理遠瞻等慙而
退武帝聞其名以問其從兄誕誕曰惠後來秀令鄙宗
之美也即以為太尉行參軍累遷世子中軍長史時會
稽內史劉懷敬之郡送者傾京師惠亦造別還過從弟

球球問向何所見惠曰唯覺即時逢人耳素不與謝靈
運相識嘗得交言靈運博辯辭義鋒起惠時然後言時荀
伯子在坐退而告人曰靈運固自蕭散直上王郎有如
萬頃陂焉嘗臨曲水風雨暴至坐者皆馳散惠獨徐起
姿制不異常時任其沾濡宋國初建當置郎中令武帝
難其人謂傅亮曰今用郎中令不可減袁曜卿既而曰
吾得其人矣曜卿不得獨擅其奇乃以惠居之少帝即
位以蔡廓為史部尚書不肯拜乃以惠代焉惠被召即
拜未嘗接客人有與書求官者輒聚置閣上及去職印

封如初談者以廓之不拜惠即拜雖事異而意同也兄
鑒頗好聚斂廣營田業惠意甚不同謂鑒曰何用田爲
鑒怒曰無田何由得食惠曰亦復何用得食其標寄如
此元嘉初卒贈太常無子惠從父弟球字禧王司徒謚
之子也少與惠齊名武帝受命爲太子中舍人宜都王
友轉諮議參軍文帝即位王弘兄弟貴動朝廷球終日
端坐未嘗相往來弘亦雅敬之歷位侍中中書令吏部
尚書時中書舍人徐爰有寵於上上嘗命球及殷景仁
與之相知球辭曰士庶區別國之章也臣不敢奉詔上

改容謝焉球簡貴不喜交游筵席虛靜門無異客曇首
常云禧王亦是玉卮無當耳旣而尚書僕射殷景仁領
軍將軍劉湛竝執重權傾動內外球雖通家姻戚未嘗
往來居選職接客甚希不視求官書疏而銓衡有序遷
光祿大夫領廬陵王師時大將軍彭城王義康專以政
事爲本刀筆簡練者多被意遇謂劉湛曰王敬弘王球
之屬竟何所堪施爲自富貴復那可解球兄子履深結
劉湛委誠義康與劉斌等球每訓厲不納自大將軍從
事中郎轉太子中庶子流涕訴義康不願違離故復爲

從事中郎文帝甚銜之及誅湛之夕履徒跣告球球命
爲取履先溫酒與之謂曰常日謂汝云何履怖不得荅
球徐曰阿父在汝何憂左右扶郎還齋上亦以球故免
死廢於家殷景仁卒球除尚書僕射王師如故素有腳
疾多病還家朝直至少錄尚書江夏王義恭謂尚書何
尚之曰當今乏才羣下宜加勩力而王球放恣如此宜
以法糾之尚之曰球有素尚加又多疾公應以淡退求
之未可以文案責也義恭又面啓文帝曰王球誠有素
譽頗以物外自許端任要切或非所長帝曰誠知如此

要是時望所歸昔周伯仁終日飲酒而居此任蓋所以
崇素德也遂見優容後以白衣領職十八年卒時年四
十九贈特進金紫光祿大夫無子以從孫魚爲後魚齊
史有傳

王彧字景文球從子也祖穆字伯遠司徒謚之長兄位
臨海太守父僧朗仕宋位尚書右僕射明帝初以后父
加特進贈開府儀同三司謚元公彧名與明帝諱同故
以字行伯父智少簡貴有高名武帝甚重之常言見王
智使人思仲祖武帝與劉穆之謀討劉毅而智在焉他日

穆之白武帝曰伐國重事公言何乃使王智知武帝笑
曰此人高簡豈聞此輩論議其見知如此爲宋國五兵
尚書封建陵縣五等子追贈太常智無子故父僧朗以
景文繼智幼焉從叔球所知憐美風姿爲一時所推讓
袁粲見之歎曰景文非但風流可悅乃哺歆亦復可觀
有一客少時及見謝混荅曰景文方謝叔源則爲野父
矣粲惆悵良久曰恨眼中不見此人景文好言理少與
陳郡謝莊齊名文帝嘗與羣臣臨天泉池帝垂綸良久
不獲景文越席曰臣以爲垂綸者清故不獲貪餌衆皆

稱善文帝甚相欽重故爲明帝娶其妹而以景文之名
名之武帝第五女新安公主先適太原王景深離絕當
以適景文景文固辭以疾故不成婚襲爵建陵子起家
太子太傅主簿轉太子舍人累遷宣城太守元凶弒立
以爲黃門侍郎未及就孝武入討景文遣間使歸款以
父在都下不獲致身事平頗見嫌責猶以舊恩累遷司
徒左長史上以散騎常侍舊與侍中俱掌獻替欲高其
選以景文及會稽孔覲俱南北之望以補之尋復爲司
徒左長史以姊墓開不臨赴免官後拜侍中領射聲校

尉左衛將軍加給事中太子中庶子坐與奉朝請毛法
因捕戲得錢百二十萬白衣領職永光初為吏部尚書
景和元年遷尚書右僕射後出為安南將軍江州刺史
明帝剪除暴主又平四方欲引朝望以佐大業乃下詔
徵景文為領左衛將軍尋加丹楊尹遭父憂起為尚書
左僕射丹楊尹固辭僕射出為江州刺史加都督服闋
乃受詔封江安縣侯固讓不許後徵為尚書左僕射領
吏部揚州刺史加太子詹事不願還朝求為湘州不許
時又謂景文在江州不能絜已景文與上辛臣王道隆

書深自申理景文屢辭內授上手詔譬之曰尚書左僕
射卿已經此任東宮詹事用人雖美職次政可比中書
令耳庶姓作揚州徐干木王休元殷鐵並處之不辭卿
清才令望何愧休元毗贊中興豈謝干木綢繆相與何
後殷鐵邪司徒以宰相不應帶神州遠遵先旨京口鄉
基義重密邇畿內又不得不同驃騎陝西任要由來用
宗室驃騎既云巴陵理應居之中流雖曰閉地控帶二
江通接荆郢經塗之要由來有重鎮如此則揚州自成
闕刺史卿若有辭便不知誰應處之此選文備與公卿

疇懷非聊爾也固辭詹事領選徙為中書令常侍僕射揚州如故又進中書監領太子太傅常侍僕射揚州如故景文固辭太傅上遣新除尚書右僕射褚淵宣旨以古來比例六事難之不得已乃受拜時太子及諸皇子小上稍為身後之計諸將帥吳喜壽寂之之徒慮其不能奉幼主並殺之而景文外戚貴盛張永累經軍旅又疑其將來難信乃自為謠言曰一士不可親弓長射殺人一士王字指景文弓長張字指張永景文彌懼乃自陳求解揚州上答詔類以貴滿誠之大氏欲其離權也

時上既有疾而諸弟並已見殺惟桂陽王休範人才本劣不見疑出為江州刺史慮一旦晏駕皇后臨朝則景文自然成宰相門族彊盛藉元舅之重歲暮不為純臣秦豫元年春上疾篤遣使送藥賜景文死使謂曰朕不謂卿有罪然吾不能獨死請子先之因手詔云與卿周旋欲全卿門戶故有此處分敕至之夜景文正與客棊扣函看復封還置局下神色怡然不變方與客棊思行爭劫竟斂子內奩畢徐謂客曰奉勅見賜以死方以勅示客酒至未飲門客焦度在側憤怒發酒覆地曰大丈夫

安能坐受死州中文武可數百人足以一奮景文曰知
卿至心若見念者為我百口計乃墨啓荅勅并謝贈詔
酌謂客曰此酒不可相勸自仰而飲之時年六十追贈
開府儀同三司謚曰懿長子絢絢字長素早惠年五六
歲讀論語至周監於二代外祖何尚之戲之曰可改耶
耶乎文哉絢應聲荅曰尊者之名安可戲寧可道草翁
之風必舅尚之子名偃故絢云云及長篤志好學位祕
書丞先景文卒謚曰恭絢弟績齊史有傳或兄子蘊字
彥深父楷大中大夫楷人才凡劣故蘊不為羣從所禮

常懷耻慨家貧為廣德令明帝即位四方叛逆欲以將
領自奮每撫刀曰龍泉太阿汝知我者叔父景文常誡
之曰阿荅汝滅我門戶蘊曰荅與童烏貴賤異童烏絢
小字荅蘊小字也及事寧封吉陽縣男歷晉陵義興太
守所莅並貪縱後為給事黃門侍郎桂陽之逼京師王
道隆為亂兵所殺蘊力戰御溝側被重創或扶以免事平
撫軍長史褚澄為吳郡太守司徒左長史蕭開明言於
朝曰褚澄開城以納賊更為股肱大郡王蘊被甲死戰
棄而不收賞罰如此何憂不亂褚淵斬乃議用蘊為湘

州刺史及齊高帝輔政蘊與沈攸之連謀事敗斬於秣陵市

王裕之字敬弘琅邪臨沂人也與武帝同諱故以字行曾祖廕晉驃騎將軍祖胡之司州刺史父茂之字興元晉陵太守敬弘少有清尚起家本國常侍衛軍參軍性恬靜樂山水求爲天門太守其妻桓玄姊也敬弘之郡玄時爲荊州遣信要令過已敬弘至巴陵謂人曰靈寶正當欲與其姊集聚耳我不能爲桓氏贅壻乃遣別船送妻往江陵妻在江陵彌年不迎山郡無事恣其遊適

意甚好之轉安西長史後爲南平太守去官居作唐縣界桓玄輔政及篡位屢召不下武帝以爲車騎將軍從事中郎徐州中從事史征西將軍道規諮議參軍時府主簿宋協亦有高趣道規並以事外相期嘗共酣飲敬弘因醉失禮爲外司所白道規即便引還重申初讌永初中累遷吏部尚書敬弘每被召即便祇奉既到宜退旋復解官武帝嘉其志不苟違也除廬陵王師加散騎常侍敬弘自陳無德不可師範令王固讓不拜元嘉三年爲尚書僕射關署文案初不省讀嘗豫聽訟上問以

疑獄敬弘不對上變色問左右何故不以訊牒副僕射
敬弘曰臣乃得訊牒讀之政自不解上甚不悅雖以禮
敬亦不以時務及之六年遷尚書令敬弘固讓表求還
東上不能奪改授侍中特進左光祿大夫給親信二十
人及東歸車駕幸冶亭餞送十二年徵爲太子少傅敬
弘詣京師上表固辭不拜東歸上時不豫自力見焉十
六年以爲左光祿大夫開府儀同三司侍中如故又詣
都表辭竟不拜東歸二十三年重申前命復辭明年薨
於餘杭之舍亭山年八十八歲順帝昇明二年追謚文
貞公敬弘形狀短小而坐起端方桓玄謂之彈碁發八
勢所居舍亭山林澗環周備登臨之美時人謂之王東
山文帝嘗問爲政得失敬弘對曰天下有道庶人不議
上高其言左右嘗使二老婦女戴五條五瓣着青紋袴
襪飾以朱粉女適尚書僕射何尚之弟述之敬弘嘗往
何氏看女值尚之不在因竒齋中卧俄頃尚之還敬弘
使二婦女子守閣不聽尚之入云政熱不堪相見君可
且去尚之於是移於他室上將爲廬陵王納其女辭曰
臣女幼旣許孔渙之息矣上亦不彊也子恢之被召爲

祕書郎敬弘求爲奉朝請與恢之書曰祕書有限故有
競朝請無限故無競吾欲使汝處於不競之地文帝嘉
而竝許之敬弘見兒孫歲中不過一再相見見輒尅日
未嘗教子孫以學問各隨所欲人或問之荅曰丹朱不
應之教竊越不聞被捶恢至位新安太守嘗請假還東
定省敬弘尅日見之至日輒不果假日將盡恢之乞求
奉辭敬弘呼前至閣復不見恢之於閣外拜辭流涕而
去恢之弟瓚之官至吏部尚書金紫光祿大夫謚曰貞
子瓚之弟昇之位都官尚書昇之子延之瓚之子秀之

列在齊史

王鎮之字伯重晉司州刺史胡之之從孫而裕之從祖
弟也祖耆之位中書郎父隨之上虞令鎮之爲剡上虞
令並有能名桓玄輔政以爲大將軍錄事參軍時三吳
飢荒遣鎮之銜命賑卹而會稽內史王愉不奉符旨鎮
之依事糾奏愉子綏玄之外甥當時貴盛鎮之爲所排
抑以母老求補安成太守以母憂去職在官清潔妻子
無以自反乃棄官致喪還上虞舊墓葬畢爲子標之求
安復令隨子之官服闋爲征西道規司馬南平太守後

爲御史中丞執正不撓百僚憚之出爲建威將軍平越
中郎將廣州刺史加都督武帝謂人曰鎮之少著清績
必將繼美吳隱嶺南弊俗非此不康也在鎮不受俸祿
蕭然無營去官之日不異初至武帝初建相國府爲諮
議參軍領錄事善於吏職嚴而不殘遷宋臺祠部尚書
武帝踐阼卒於宣訓衛尉弟弘之少孤貧育於外祖徵
士何準從叔獻之及太原王恭並貴重之晉安帝隆安
中爲司徒主簿性好山水求爲烏傷令尋以病歸桓玄
輔政拒謙以爲衛軍參軍時殷仲文還姑熟祖送傾朝

謙要弘之同行荅曰凡祖離送別必在有情下官與殷
風馬不接無緣扈從謙貴其言母隨兄鎮之之安成郡
弘之解職同行義熙中何無忌及武帝辟召一無所就
從兄敬弘爲吏部尚書表薦弘之爲太子庶子不就文
帝即位敬弘爲尚書左僕射又陳弘之高行表於初筮
苦節彰於暮年當今內外晏然脩太平之化宜招空谷
以敦冲退之美又徵爲通直散騎常侍不就敬弘嘗解
貂裘與之即著以採藥家在會稽上虞性好釣上虞江
有一鰓名三石頭弘之每垂釣於此經過者不識之或

問漁師得魚賣不弘之曰亦自不得得亦不賣日夕載魚入上虞郭經親故門各以一兩頭置門內而去始寧沃川有佳山水弘之又依巖築室謝靈運顏延之並相欽重靈運與廬陵王義真牋曰會稽既豐山水是以江左嘉道並多居之但季世慕榮幽栖者寡若王弘之拂衣歸耕踰歷三紀孔淳之隱約窮岫自始迄今阮萬齡辭事就閑纂成先業既遠同義唐亦激貪厲競浙河之外栖遲山澤如斯而已殿下愛素好古夢想巖穴若遣一介有以相存真可謂千載盛美也弘之元嘉四年卒後顏延之欲爲作誄終不就弘之子曇生好文義以謙和見稱歷吏部尚書太常卿孝武末爲吳興太守明帝初吳興與四方同逆戰敗歸降被宥終於中散大夫阮萬齡陳留尉氏人祖思曠左光祿大夫父寧黃門侍郎萬齡少知名爲孟昶建威長史時袁豹江夷相繼爲昶司馬時人謂昶府有三素望萬齡家在會稽剡縣頗有素情位左戶尚書太常出爲湘州刺史無政績後爲散騎常侍金紫光祿大夫卒曇生弟普曜位祕書監普曜子晏自有傳

王韶之字休泰胡之從孫而敬弘從祖弟也祖羨之鎮軍掾父偉之少有志尚當世韶命表奏輒手自書寫太元隆安時事小大悉撰錄位本國郎中令韶之家貧好學嘗三日絕糧而執卷不輒家人謂之曰困窮如此何為不耕荅曰我常自耕耳父偉之為烏程令韶之因居縣境好史籍博學多聞初為衛將軍謝琰行參軍得父舊書韶之因私撰晉安帝陽秋既成時人謂宜居史職即除著作佐郎使續後事訖義熙九年善叙事辭論可觀為後代佳史遷尚書祠部郎晉帝自孝武以來常居

內殿武官主書於中通呈以省官一人管司韶誥住在西省因謂之西省郎傅亮羊徽相代領西省事義熙十一年武帝以韶之博學有文辭補通直郎領西省事轉中書侍郎安帝之崩也武帝使韶之與帝左右密加酖毒恭帝即位遷黃門侍郎領著作西省如故凡諸韶奏皆其辭也武帝受禪加驍騎將軍本郡中正黃門如故西省職解復掌宋書坐璽制謬誤免黃門事在謝晦傳韶之為晉史序王珣貨殖王廞作亂珣子弘廞子華並貴顯韶之懼為所陷深結徐羨之傅亮等景平元年遷

侍中出爲吳郡太守羨之被誅王弘入爲相領揚州刺史弘雖與韶之不絕諸弟未相識者皆不復往來韶之在郡常慮爲弘所繩夙夜勉勵政績甚美弘亦抑其私憾文帝兩嘉之韶之在任積年稱爲良守徵爲祠部尚書加給事中坐去郡長取送故免官十二年又爲吳興太守卒撰孝經傳三卷文集行於世宋七廟歌辭韶之所制也子暉位臨賀太守

王悅之字少明晉右軍將軍羲之曾孫也祖獻之中書令父靖之司徒左長史爲劉穆之所厚就穆之求侍中如

此非一穆之曰卿若不求父自得之遂不果悅之少厲清操亮直有風檢爲吏部郎隣省有會同者遺悅之餅一甌辭不受曰此費誠小然少來不願當之明帝泰始中爲黃門郎御史中丞上以其廉介賜良田五頃以爲侍中在門下盡其心力掌檢校御府太官太醫諸署時承奢汰之後姦竊者衆悅之案覆無所避得姦甚多於是衆署共呪詛悅之悅之病甚恒見兩烏衣人捶之及卒上乃收典掌者十許人桎梏之送淮陰密令度瓜步江投之中流

王准之字元魯晉尚書僕射彬玄孫也曾祖彪之位尚書令祖臨之父納之並御史中丞彪之博聞多識練悉朝儀自是家世相傳並諳江左舊事絨之青箱世人謂王氏青箱學准之兼明禮傳贍於文辭起家爲本國右常侍桓玄篡位以爲尚書祠部郎武帝起兵爲太尉主簿出爲山陰令有能名豫討盧循功封都亭侯宋臺建除御史中丞爲百僚所憚自彪之至准之四世居此職准之嘗作五言詩范泰嘲之云卿唯解彈事耳准之正色答曰猶差卿世載雄狐坐世子右衛率謝靈運殺人

舉免官武帝受命拜黃門侍郎永初中奏曰鄭玄注禮三年之喪二十七月而吉古今學者多謂得禮之宜晉初用王肅議祥禫共月故二十五月而除遂以爲制江左以來準晉朝施用搢紳之士多遵玄義夫先王制禮以大順羣心喪也寧戚著在前經今大宋開泰品物遂理愚謂宜同即物情以玄義爲制朝野一禮則家無殊俗從之元嘉中歷位侍中郎官尚書改領吏部性峭急頗失縉紳之望出爲丹楊尹准之究識舊儀問無不知時大將軍彭城王義康錄尚書事每歎曰何須高論玄

虛正得如王准之兩三人便足了天下矣然寡之風素不為時流所重所撰儀注朝廷咸見遵用年二十九卒贈太常子輿之位征虜主簿輿之子進之列在梁史准之族子素字休業高祖翹之晉光祿大夫曾祖望之祖泰之並不仕父元弘位平固令素少有志行家貧母老初為廬陵王國侍郎母憂去職往東陽隱居不仕頗管田園之資得以自立愛好文義不以人俗累懷孝武帝下詔徵素與處士朱百年並為太子舍人不就素既屢被徵辟聲譽甚高山中有蚊蟲聲甚清長聽之使人不

厭而其形甚醜素乃為蚊賦以自況泰始七年卒年五十四

王懿字仲德太原祁人自言漢司徒允弟幽州刺史懋七世孫也祖宏仕石虎父苗仕苻堅皆至二千石仲德少沉審有意畧事母甚謹學通陰陽精解聲律苻氏之敗仲德年十七與兄叡字元德同起義兵與慕容垂戰敗仲德被重創走與家屬相失路徑大澤不能前困憊卧於林中忽有一小兒青衣年可七八歲騎牛行見仲德驚問曰漢已食未仲德言飢小兒去須臾復來得飯

通志宋列傳四六
與之仲德食畢欲行會暴雨江溢莫知津逕遇荷一白
狼至前仰天而號號訖銜仲德衣因渡水仲德隨之得
濟與元德相及渡河至滑臺復為翟遼所留使為將帥
積年仲德欲南歸乃棄遼奔泰山遼遣騎追之急夜行
忽見前有猛炬導之乘火行百許里得免晉太元末徙
居彭城兄弟名犯晉宣元二帝諱故以字行北土重同
姓並謂之骨肉有遠來相投者莫不竭力營贍若有一
人不至者以為不義不為鄉邑所容仲德聞王愉在江
南貴盛是太原人乃遠來歸之愉接遇甚薄因至姑熟

投桓玄值玄篡位見輔國將軍張暢言及世事仲德曰
自古革命誠非一族然今之起者恐不足以濟大事元
德果勁有計畧仕玄為殿中將軍武帝甚知之告以義
舉使元德於京邑襲玄仲德聞其謀謂元德曰天下大
事不可不密且兵家務拙速不貴巧遲玄無遠慮好冒
夜出入今取之正須一夫力耳事泄元德為玄所誅仲
德竄走會義軍尅京邑仲德抱元德子方回出候武帝
帝於馬上抱方回與仲德相對號慟追贈元德給事中
封安復縣侯以仲德為鎮軍中兵參軍武帝伐廣固仲

德率諸軍爲前鋒小大二十餘戰每戰輒克盧循寇逼
敗劉毅於桑落帝北伐始還衆議並欲遷都仲德正色
曰今天子當陽而治明公命世作輔新建大功威震六
合妖寇豸突乘我遠征既聞凱入將自奔散且四海之
內所以奉明公者道存故爾今自投草莽則同之匹夫
匹夫號令何以威物義士英豪當求其主耳此謀若行
請從此辭武帝甚悅除輔國將軍使戎白石及循退仲
德率劉鍾追討大破之功冠諸將封新淦縣侯義熙十
二年北伐進仲德征虜將軍加冀州刺史督前鋒誦軍

事冠軍將軍檀道濟龍驤將軍王鎮惡向洛陽寧朔
軍劉遵考建武將軍沈林子出石門寧朔將軍朱超石
胡藩向半城咸受統於仲德仲德率龍驤將軍朱牧寧
遠將軍竺靈秀嚴綱等開鉅野入河乃總衆軍進據潼
關武帝遂平長安以仲德爲太尉諮議參軍武帝欲遷
都洛陽衆咸以爲宜仲德曰反宅中華誠是億兆顛顛
之望然天下艱難羣虜孔熾暴師經載士有歸心王化
始通新邦未附以衆情言之恐未易可立今當以建業
爲王基江左爲始本遷都之計以俟文軌大同帝深納

之使衛送姚泓先還彭城武帝受命累遷徐州刺史加都督元嘉三年進號安北將軍與到彥之北伐大破魏軍魏棄河南司兗而去三州既定三軍咸喜而仲德獨有憂色曰胡虜雖仁義不足而凶狡有餘今雖斂戈北歸若河水合豈不能為三軍患諸賢不諳北土情偽必墮其計諸軍進屯靈昌十月虜於委粟津渡河進逼金墉而洛陽虎牢並不守彥之聞二城並沒欲焚舟步走仲德曰洛陽旣敗虎牢無以自立理必然也虜去我猶自千里滑臺尚有彊兵若便捨舟士卒必散且當入濟

至馬耳谷口更詳所宜乃回軍汭濟南歷城步上焚舟棄甲還至彭城仲德坐免官尋與檀道濟共救滑臺糧盡乃歸自是復失河南九年又為鎮北將軍徐州刺史仲德三臨徐州威惠宣著於彭城立佛寺作白狼童子像於塔中以存河北所遇也十三年進號鎮北大將軍十五年卒年九十謚曰桓侯亦於廟中立白狼童子壇每祭必祠之子正循嗣為家童所殺仲德兄孫文和景和中為征北義陽王昶府佐昶於彭城奔魏部曲皆散文和獨送至界上昶謂曰諸人皆去卿有老母何獨不

去文和乃去昇明中爲巴陵內史沈攸之事起文和斬
其使馳白齊武帝及齊永明年中歷青冀兗益四州刺
史

到彥之字道豫彭城武原人楚大夫屈到之後也少以
寒苦自立武帝討孫恩以鄉里樂從每有戰功義旗將
起彥之家在廣陵臨川武烈王道規剋桓弘彥之時近
行不在聞事捷馳歸而道規已南渡江彥之倉卒晚方
獲濟至京口武帝已向京邑孟昶居守留之及事定武
帝謂同義曰到彥之應來而不至必有故也及彥之至

帝責之亦不自陳昶又不申理故不加官爵白衣隨道
規追拒玄於崢嶸洲力戰有功義熙元年補鎮軍行參
軍六年盧循逼京都彥之與檀道濟掩循輜重與循黨
荀林戰敗免官後以軍功封佷山縣子爲太尉中兵參
軍遷道規輔國參軍建平太守武帝討司馬休之休之
苻郡發兵彥之斬休之使率軍出峽口進次宜都宜都
太守師寂說彥之曰司馬平西宗室之重寬仁得衆魯
雍州父子一世驍雄今據六州之地率用命之士國富
兵精難以爲敵劉公遠軍師疲衆老轉禍爲福子其圖

彥之慨然曰我受恩過分託身劉氏如其王旅不振受屈勅敵當以死報國家况倚天子之威馮泰山之固劉公果決獨斷用兵如神奮百勝之威責不臣之罪迴山壓刃何憂不濟彥之進見武帝帝大悅更配百艦以爲先登事平驃騎將軍道憐鎮江陵以彥之爲驃騎諮議參軍尋遷司馬南郡太守武帝受命以佐命功進爵佷山縣侯彥之佐守荆楚垂二十載威信爲士民所懷又從文帝西鎮除使持節南蠻校尉及徐羨之等廢少帝與傅亮等率百僚奉迎文帝帝以少帝及廬陵王並

見殺疑不敢下彥之與司馬王華以爲羨之等必無異志從之又欲使彥之領兵前驅彥之曰彼旣不貳便應朝服順流若使有虞此師旣不足恃更開嫌隙之端非所以允荅羣情副遠邇之望也會雍州刺史褚叔度卒乃遣彥之權鎮襄陽羨之等欲即以彥之爲雍州上不許徵爲中領軍委以戎政彥之自襄陽下謝晦已至鎮慮彥之不過已彥之至揚口乃步往江陵深布誠款晦亦厚自結納彥之船出揚口留馬數十匹及利劍名刀悉以與晦晦意由此大安元嘉三年討晦進彥之鎮軍

將軍彥之於彭城洲戰不利咸欲退還夏口彥之不回
會檀道濟至晦乃敗走江陵平因監荊州州府事改封
建昌縣公其秋遷南豫州刺史監六州諸軍事鎮歷陽
上於彥之恩寵隆密將加開府欲先令立功七年遣彥
之督王仲德竺靈秀尹冲段宏趙伯符竺靈真庾俊之
朱脩之等八軍北伐自淮入泗泗水峻日裁行十里自
四月至七月始至東平須昌縣魏濟州刺史庫悉吉戎
礪礪焚城走兗州刺史叱羅俊燒滑臺率衆奔河北遣
將軍王玄謨向虎牢魏大將赤歇據城戰大破之斬赤

歇等六人首魏洛州刺史亦棄洛陽奔彥之留朱脩之
守滑臺尹冲守虎牢杜驥守金墉十月魏軍向金墉次
至虎牢杜驥奔走尹冲衆潰而死十一月朔魏軍向滑
臺時河水將合糧食又罄彥之先有目疾至是大動將
士疾疫乃迴軍入濟焚舟步上依險南出得至彭城初
遣彥之資實甚盛及還凡百蕩盡府藏爲空彥之上章
節謝罪文帝遣檀道濟北救滑臺收彥之下獄免官充
州刺史竺靈秀奔軍伏誅明年夏起彥之爲護軍九年
復封爵邑固辭明年卒乃復先戶邑謚曰忠公孝建三

年詔彥之與王華王曇首配食文帝廟庭長子元度位
益州刺史少子仲度嗣位驃騎從事中郎兄弟並有才
用皆早卒仲度子撫列在陳史

垣護之字彥宗略陽垣道人也族姓豪彊石虎時自略
陽徙鄴祖敞仕苻氏爲長樂國郎中令伯父遵父苗仕
慕容超並見委任遵爲尚書苗爲京兆太守武帝圍廣
固遵苗踰城歸降並以爲太尉行參軍元嘉中遵爲負
外散騎常侍苗屯騎校尉仍家下邳護之少凋儻不拘
小節形狀短陋而氣幹彊果元嘉初爲殿中將軍隨到

彥之北侵魏彥之將回師護之以書諫彥之不納散敗
而歸文帝聞而喜之累遷鐘離太守隨王玄謨入河玄
謨攻滑臺護之以百舸爲前鋒進據石濟及魏救將至
馳書勸玄謨急攻之不見從玄謨敗退不暇報護之而
魏軍悉牽玄謨水軍大艘連以鐵鎖三重斷河以絕護
之還路河水迅急護之中流而下每至鐵鎖以長柯斧
斷之魏人不能禁唯失一舸餘舸並全留戍麋溝城還
爲江夏王義恭驃騎戶曹參軍戍淮陰領濟北太守三
十年文帝崩還屯歷下孝武入討率所領馳赴帝以爲

冀州刺史及南郡王義宣反兗州刺史徐遺寶護之妻
弟也與護之書勸使同逆護之馳使以聞率軍隨沈慶
之等擊魯爽義宣率大眾至梁山與王玄謨相持柳元
景率護之及護之弟詢之柳叔仁鄭琨等出鎮新亭玄
謨求上遣元景等進據西州護之水軍先發大破賊將
龐法起元景乃以精兵配護之追討魯朱脩之已平江
陵至尋陽而還遷徐州刺史封益陽縣侯後拜青冀二
州刺史鎮歷城大明二年徵為右衛將軍還於道聞竟
陵王誕據廣陵反護之即率部曲受車騎大將軍沈慶
之節度事平轉臨淮太守徙豫州刺史護之所莅多聚
歛貨賄七年坐下獄免官明年起為太中大夫未拜以
憤卒謚壯侯護之弟子崇祖齊史有傳

張興世字文德竟陵人也本名世明帝益為興世少家
貧白衣隨王玄謨伐蠻每戰輒禽獲諸將不及玄謨其
奇之孝武鎮尋陽以補南中郎參軍督護從入討元凶
隸柳元景為前鋒及南郡王義宣反又隨玄謨出梁山
有戰功明帝即位四方反叛進興世號龍驤將軍領水
軍拒南賊時臺軍據赭圻朝廷遣吏部尚書褚淵就赭

圻行選是役也皆先戰授位檄版不供由是有黃紙札
南賊屯鵠尾相持久不決興世建議曰賊據上流兵張
地勝我今相持有餘而制敵不足若以奇兵潛出其上
因險自固隨宜斷截使其首尾周惶進退疑沮中流一
梗糧運自艱乃制勝之奇也沈攸之吳喜並贊其計分
戰士七千配之興世乃令輕舸泝流而上旋復迴還一
二日中輒復如此使賊不爲之備賊帥劉胡聞興世欲上
笑之曰我尚不敢越彼下取揚州張興世何人欲輕據
我上興世謂攸之等曰上流唯有錢溪可據今往據之

其夜四更值便風乃舉颿直前徑據錢溪劉胡來攻將
士欲迎擊之興世曰賊來尚遠而氣驟盛夫驟旣力盡
盛亦易衰此曹翹所以破齊也將士不得妄動賊來轉
近興世乃命壽寂之任農夫率壯士擊走之袁顛愠曰
賊據人肝藏裏云何得活是月朔赭圻軍士伐木爲柵
於青山遇一童子曰賊下旬當平無爲自苦忽不見至
是果敗興世又遏其糧道賊衆漸飢劉胡棄軍走袁顛
仍亦奔散興世遂與吳喜共平江陵遷右軍將軍封作
唐縣侯泰豫元年爲雍州刺史左衛將軍以疾徙光祿

大夫尋卒興世居臨沔水沔水自襄陽以下至于九江
二千里中先無洲嶼興世初生當其門前水中一旦忽
生洲年年漸大及至興世爲方伯洲大十餘頃父仲子
由興世致位給事中興世欲將往襄陽仲子愛戀鄉里
不肯去嘗謂興世曰我雖田舍老公樂聞鼓角汝可送
一部行田時欲吹之興世素恭謹畏法譬之曰此是天
子鼓角非田舍公所吹興世欲拜墓仲子謂曰汝衛從
太多先人必當驚怖興世減撤而後行子欣泰齊史有
傳

袁湛字士深陳郡陽夏人也祖耽晉歷陽太守父質琅
邪內史竝知名湛少與弟豹並爲從外祖謝安所知安
以其兄子女妻湛武帝起兵以爲鎮軍諮議參軍以
從征功封晉寧縣五等男義熙十二年爲尚書左僕射
武帝北伐湛兼太尉與兼司空尚書范泰奉九命禮物
拜授武帝帝冲讓湛等隨軍至洛陽任栢谷塢泰議受
使未畢不拜晉帝諸陵湛獨至五陵展禮時人美之初
陳郡謝重王胡之外孫也於諸舅敬禮多闕重子絢湛
之甥也嘗於公坐謾湛湛正色謂曰汝便是兩世無渭

陽情絢有愧色十四年卒贈左光祿大夫文帝即位以
后父贈侍中左光祿大夫開府儀同三司謚曰敬公大
明三年孝武幸藉田經湛墓遣使致祭增守墓五戶子
淳淳子植並早卒湛弟豹字士蔚好學博聞窮覽典籍
初爲著作佐郎累遷劉毅諮議參軍領記室豹善談雅
俗每商較古今兼以誦詠聽者忘疲爲御史中丞時鄱
陽縣侯孟懷玉上母擅氏拜國太夫人有司奏許之豹
以爲婦人從夫之爵懷玉父大司農綽見居列卿妻不
宜從子奏免尚書右僕射劉柳左丞徐羨之郎何劭之

官詔並贖論後坐事降爲丹楊尹太尉長史從朱齡
石伐蜀武帝使豹爲檄文甚工義熙九年卒後以參伐
蜀之謀追封南昌縣五等子子洵吳郡太守洵弟淑太
子左衛率不從元凶之亂爲其所殺在忠義傳洵子顓
字國章初爲豫州主簿累遷晉陵太守襲南昌縣五等
子大明末拜侍中領前軍將軍時新安王子鸞以母嬖
有盛寵太子在東宮多過上微有廢太子立子鸞之意
從容言之顓盛稱太子好學有日新之美帝怒振衣而
入顓亦厲色而出左丞徐羨言於帝請宥之帝意解後

帝又以沈慶之才用不多言論頗相唾毀慶之又陳慶之忠勤有幹畧堪當重任由是前廢帝深感慶之亦懷其德景和元年誅羣公欲引進顓任以朝政遷爲吏部尚書封新淦縣子俄而意趣乖異寵待頓衰始令顓與沈慶之徐爰參知選事尋復反以爲罪使有司糾奏坐白衣領職從幸湖熟往反數日不被命顓慮禍求出乃除建安王休仁安西長史休仁不行即以顓爲寧蠻校尉雍州刺史加都督顓舅蔡興宗謂曰襄陽星惡豈可邪顓曰白刃交前不救流矢今者之行本願生出虎

口且天道遼遠何必皆驗如其有徵當將德以禳之於是狼狽上路怛慮見追行至尋陽曰今知免矣與鄧琬款狎過常每清閑必盡日窮夜顓與琬人地本殊衆知其有異志矣及至襄陽使劉胡繕脩兵械會明帝定大事進顓號右將軍遣荊州典籤邵宰乘驛還江陵道由襄陽顓反意已定而糧仗未足且欲奉表於明帝顓子秘書丞戩曰一奉表疏便爲彼臣以臣伐君於義不可顓從之顓詐云被大皇太后令使其起兵便建牙馳驛奉勸晉安王子勛即大位與琬書使勿解甲子勛即位

進號顓安北將軍加尚書左僕射顓本無將畧在軍中未嘗戎服語不及戰陣唯賦詩談議而已不能撫接諸將劉胡每論事酬對甚簡由此大失人情胡常切齒志恨胡以南軍未至軍士匱乏就顓換襄陽之資顓答曰都下兩宅未成方應經理不可損徹又信往來之言言都下米貴斗至數百以爲不勞攻伐行自離散於是擁甲以待之明帝使顓舊門生徐碩奉手詔譬顓曰卿未經爲臣今追蹤竇融猶未晚也及劉胡叛走不告顓顓至夜方知大怒罵曰今年爲小子所誤呼取飛鷲謂其

衆曰我當自出追之因又遁走至鵲頭與成王薛伯珍及其所領數千步青林欲向尋陽夜止山間宿殺馬勞士顓顧伯珍曰我舉八州以謀王室未一戰而敗豈非天邪非不能死蓋欲草間求活望一至尋陽謝罪主上然後自刎耳因慷慨叱左右索節無復應者及旦伯珍請求聞言乃斬顓首詣錢溪馬軍主襄陽俞湛之降湛之因斬伯珍併送首以爲已功明帝忿顓違叛流尸於江弟子豕收瘞於石頭後岡後廢帝即位方得改葬顓子戩昂戩爲黃門侍郎成溢城尋陽敗伏誅昂知名梁

世有傳顛從父弟粲順帝初遷中書監司徒侍中時齊高帝將革命粲於石頭舉兵匡復不克死之列在忠義傳

孔靖字季恭會稽山陰人也名與武帝祖諱同故以字稱祖瑜晉車騎將軍父閭散騎常侍季恭始察孝廉累遷司徒左西掾未拜遭母憂隆安五年被起為山陰令不就武帝東征孫恩屢至會稽過季恭宅季恭正晝卧有神人衣服非常謂曰起天子在門既而失之遽出道元帝延入結交執手曰卿後當大貴願以身為託於是

曲意禮接贈給甚厚帝後討孫恩時桓玄篡形已著帝欲於山陰建義季恭以山陰路遠且玄未居極位不如待其篡後於京口圖之帝以為然時虞嘯父為會稽內史季恭求為府司馬不得乃出詣都及帝定桓玄以季恭為會稽內史使齎封版拜授正與季恭遇季恭便回舟夜還至即叩扉入郡嘯父本為桓玄所授聞玄敗開門請罪季恭慰勉使且安所任明日乃以季恭到任整釐整浮華剪罰游惰由是竟內肅清累遷吳興太守加冠軍先是吳興頻喪太守言項羽神為卞山王居郡聽事

二千石常遊之季恭居聽事竟無害也遷尚書左僕射
固讓義熙八年復爲會稽內史脩飾學校督課誦習十
年復爲右僕射又讓不拜除領軍加散騎常侍十二年
致仕拜金紫光祿大夫是歲武帝北伐季恭求從以爲
太尉軍諮祭酒從平關洛宋臺初建以爲尚書令又讓
乃拜侍中特進左光祿大夫辭事東歸帝餞之戲馬臺
百僚咸賦詩以述其美及受命加開府儀同三司季恭
讓累年不受薨以爲贈子靈符位丹楊尹會稽太守尋
加豫章王子尚撫軍長史靈符家本豐富產業甚廣又

於永興立墅周四三十三里水陸地二百六十五頃舍
帶二山又有果園九處有司所糺詔原之而靈符對
答不實坐免尋又復官靈符慙實有堪幹不存華飾每
所莅官政績脩理廢帝景和中犯忤近臣爲所讒構遣
使鞭殺之二子湛之深之於都賜死明帝即位追贈靈
符金紫光祿大夫深之大明中爲尚書比部郎時安陸
應城縣人張江陵與妻吳共罵母黃令死黃忿恨自經
死已值赦案律子賊殺傷毆父母梟首罵詈棄市謀殺
夫之父母亦棄市會赦免刑補治江陵罵母母以自裁

重於傷毆若同殺科則疑重用傷毆及詈科則疑輕制
唯有打母遇赦猶梟首無詈母致死會赦之科深之議
曰夫題里逆心而仁者不入名且惡之况乃人事故毆
傷呪詛法所不原詈之致盡則理無可宥罰有從輕蓋
疑失善求之文旨非此之謂江陵雖遇赦恩故合梟首
婦本以義愛非天屬黃之所恨情不在吳原死補治有
允正法詔如深之議靈符弟靈運位著作郎靈運子琇
之齊史有傳

孔琳之字彥琳會稽山陰人也曾祖羣晉御史中丞祖

沈丞相掾父盛光祿大夫琳之彊正有志力少好文善
解音律能彈碁妙善草隸桓玄輔政為太尉以為西閣祭
酒玄時議欲廢錢用穀帛琳之議曰洪範八政以貨次
食豈不以交易之所資為用之至要者乎故聖王制無
用之貨以通有用之財既無毀敗之費又省難運之苦
此錢所以嗣功龜貝歷代不廢者也穀帛為寶本充衣
食今分以為貨則致損甚多又勞毀於商販之手耗棄
於割截之用此之為弊著於昔曩故鍾繇曰巧偽之人
競濕穀以要利制薄絹以充資魏世制以嚴刑弗能禁

也是以司馬芝以爲用錢非徒豐國亦所以省刑今既用而廢之則百姓頓亡其財是有錢無糧之人皆坐而飢困此斷之之弊也魏明帝時錢廢穀用四十年矣以不便於人乃舉朝大議精才達故之士莫不以宜復用錢彼尚舍穀帛而用錢足以明穀帛之弊著於已試也玄又議復肉刑琳之以爲三代風純而事簡故罕蹈刑辟季末俗巧而務殺故動陷憲網若三千行於叔世必有踊貴之尤此五帝不相循法肉刑不可悉復者也漢之發仁惻之意傷自新之路莫由革古創制號稱刑厝

然名輕而實重反更傷人故孝景嗣位輕之以緩緩人慢又不禁邪期于刑罰之中所以見美於昔歷代詳論而未獲厥中者也兵荒已後懼法更多棄市之刑本斬右趾漢文一謬承而弗革所以前賢恨恨議之而未辯鐘繇陳羣之意雖小有不同欲以右趾代棄市若從其言則所活者衆矣降死之生誠爲輕法可以全其性命蕃其產育仁既濟物功亦益衆又今之所患逋逃爲先屢叛不革宜令竄身靡所亦以肅戒未犯永絕惡原至於餘條宜且依舊玄好人附悅而琳之不能順旨是

以不見知累遷尚書左丞揚州中從事史所居著績時
責衆官獻便宜議者以爲宜脩庠序卹典刑審官方明
黜陟舉逸拔才務農簡調琳之於衆議之外別建言曰
夫璽印者所以辯章官爵立契符信官莫大於皇帝爵
莫尊於公侯而傳國之璽歷代遞用襲封之印奕世相
傳貴在仍舊無取改作今世唯尉一職獨用一印至於
內外羣官每遷悉改討尋其義私所未喻若謂官各異
姓與傳習不同則未若異代之爲殊也若論其名器雖
有公卿之貴未若帝王之重若以或有誅夷之臣忌其

凶穢則漢用秦璽延祚四百未聞以子嬰身戮國亡而
棄不佩帝王公侯之尊不疑於傳璽人臣衆僚之卑何
嫌於即印載籍未聞其說推別自乖其準而終年刻鑄
喪功消實金銀銅炭之費不可稱言非所以因循舊貫
易簡之道愚謂衆官即用一印無煩改作若新置官又
官多印少文或零失然後乃鑄則仰裨天府非唯小益
又曰函門栢歷不出禮典起自末代積習生常遂成舊
俗爰自天子達于庶人誠行之有由卒改必駭然苟無
關於情而有愆禮度存之未有所明去之未有所失固

當式遵先典釐革後謬况復兼以游費實爲人患者乎
凡人士喪儀多出閭里每有此須動十數萬損人財力
而義無所取至於寒庶則人思自竭雖復室如懸磬莫
不傾產單財所謂葬之以禮其若是乎愚謂宜一切罷
凶門之式遷尚書吏部郎義熙十二年除武帝平北征
西長史遷侍中宋臺初建除宋國侍中永初二年爲御
史中丞明憲直法無所屈撓奏劾尚書令徐羨之虧違
憲典時羨之領揚州刺史琳之弟璩之爲中從事羨之
使璩之解釋琳之使停寢其事琳之不許曰我觸忤宰

相正當罪止一身汝必不應從坐何須勤勤邪自是君
僚震肅莫敢犯禁武帝甚嘉之行經蘭臺親加臨幸遷
祠部尚事不事產業家尤貧素景平元年卒追贈太常
卿子邈有父風官至揚州中從事邈子顓字思遠少骨
鯁有風力以是非爲己任口吃好讀書早知名初舉揚
州秀才衡陽王義季以爲安西記室顓奉牋固辭義季
不能奪累遷黃門侍郎初晉安帝時散騎常侍選望甚
重與侍中不異其後職任閑散用人漸輕孝建三年孝
武欲重其選於是吏部尚書顏竣舉顓及司徒左長史

王景文並堪散騎常侍帝不欲威權在下其後分吏部尚書置二人以輕其任侍中蔡興宗謂人曰選曹要重常侍閑淡改之以名而不以實雖主意欲為輕重人心豈可變邪既而常侍之選復卑選部之貴不異大明元年徙太子中庶子領翊軍校尉歷祕書監廷尉卿為御史中丞坐鞭令史為有司所糾原不問六年除顓安陸王子綏冠軍長史江夏內史復隨府轉後軍長史內史如故為人仗酒使氣每醉輒彌日不醒僚類間多所陵忽尤不能曲意權倖莫不畏而疾之不治產業居常貧

罄無有豐約未嘗關懷為府長史典籤諮事不呼前不敢前不令去不敢去雖醉日居多而明曉政事醒時判決未嘗有壅衆咸云孔公一月二十九日醉勝他人二十九日醒也孝武每欲引見先遣人覘其醉否性真素不尚矯飾遇得寶玩服用不疑而他物麤敗終不改易時吳郡顧顓之亦尚儉素衣裘器服皆擇其陋者宋世言清約稱此二人顓弟道存從弟徽之頗營產業二弟請假東還顓出渚迎之輜重十餘船皆是綿絹紙席之屬覲見之偽喜謂曰我比乏得此甚要因令上置岸側

既而正色謂道存等曰汝輩忝預士流何至還更作賈
客邪命燒盡乃去先是庾徽之爲御史中丞性豪麗服
玩甚華顓代之衣冠器用莫不麤率蘭臺令史並三吳
富人並有輕之之意顓蓬首緩帶風貌清嚴皆重跡屏
氣莫敢欺犯庾徽之字景猷潁川陽陵人也後卒於南
東海太守顓後爲司徒左長史道存代顓爲後軍長史
江夏內史時東土大旱都邑米貴一斗將百錢道存慮
顓甚乏遣吏載五百斛米餉之顓呼吏謂之曰我在彼
三載去官之日不辦有路糧郎至彼未幾那能便得此

米邪可載米還彼吏曰自古以來無有載米上水者都
下米貴乞於此貸之不聽吏乃載米而去永光元年遷
侍中後爲尋陽王右軍長史行會稽郡事明帝即位召
爲太子詹事遣顓佐平西司馬庾業爲右軍司馬代顓
行會稽郡事時上流反叛上遣都水使者孔瑛入東慰
勞瑛至說顓以廢帝侈費都下罄匱今南北並起遠近
離叛若擁五郡之銳招動三吳事無不尅顓然其言遂
發兵馳檄顓長子公瑛二子淹玄並在都馳信密報泰
始二年正月並逃叛東歸遣書要吳郡太守顧琛琛以

母年篤老又密邇建鄴與長子寶素謀議未判少子寶
先時爲山陰令馳書報琛以爲南師已近朝廷孤弱不
時順從必有覆滅之禍時顓前鋒已渡浙江琛遂據郡
同反吳興太守王曇生義興太守劉延熙晉陵太守袁
標一時響應庾業旣東明帝即以代延熙爲義興以延
熙爲巴陵王休若鎮東長史業至長塘湖即與延熙合
明帝遣建威將軍沈懷明東討尚書張永繼進巴陵王
休若董統東討諸軍顓所遣孫曇瓘等軍頓晉陵九里
部陣甚盛懷明至奔牛所領寡弱張永至曲阿未知懷

明安否退還延陵就休若諸將咸勸退破岡休若宣令
敢有言退者斬衆少定乃築壘息甲建武將軍吳喜及
督護任農夫等繼至先是龍驤將軍阮佃夫募得蜀人
數百多壯勇便捷皆着犀皮鎧執短兵遂配農夫及戰
每先登東人並畏憚又恠其形飾殊異舊傳狐獠食人
東人見之輒奔農夫進義興與吳喜擊諸柵大破之義
興平劉延熙投水死時齊高帝率張永劉亮等諸軍至
晉陵九里西結營與東軍相持上遣積射將軍江方興
南臺御史王道隆至晉陵視賊形勢賊帥孫曇瓘程抃

宗陳景達凡有五城互相連帶扞宗城猶未圍道隆率所領急攻之俄頃城陷斬扞宗首劉亮果勁以刀楯直入重柵衆軍隨之即皆摧破高帝與永等乘勝馳擊又大破之曇瓘因此敗走孔璪與曇生焚倉庫奔錢唐會稽聞西軍稍近將士多奔亡顓不能復制上虞令王晏起兵攻郡顓以東西交逼憂遽不知所爲其夕率千人聲云東討實趨石澗遇潮涸不得去衆叛都盡門生載以小船竄于山崎村村人縛以送晏晏調曰此事孔璪之爲無豫卿事可作首辭當拒爲申理顓曰江東處分

莫不由身委罪求活便是君輩行意耳晏乃斬之東閣外臨死求酒曰此是平生所好僞中郎張綬封倉庫以待王師晏至郡叔綬執尋陽王子房縱兵大掠府庫空盡孔璪投門生陸林夫林夫斬首以送顧璪王曇生袁標等並詣吳吉歸罪喜皆宥之東軍主凡七十六人於陣斬十七人餘皆原宥顓之起兵也夢行宣陽門道上顧望皆丘陵嶺寤私告人曰丘陵者弗平建康其殆難尅顓弟道存位甚六門侍郎南海太守晉安王子勛建僞號以爲侍中行益州事事敗見殺

殷景仁陳郡文平人也曾祖融晉太常祖茂之特進左
光祿大夫父道裕早亡景仁少有大成之量司徒王謐
見而以女妻之為武帝太尉行參軍歷位中書侍郎景
仁學不為才而敏有思致口不談議而深達理至於國
典朝議舊干記注莫不撰錄識者知其有當世之志也
嘗建議請一官舉才以所薦能否黜陟武帝甚知之遷
太子庶子少帝即位入補侍中累表辭讓詔曰景仁退
挹之懷七不可奪可改除黃門侍郎以申君子之請後
聖左衛將軍文帝即位委遇彌厚俄遷侍中左衛如故

時與王華王曇首劉湛四人並時為侍中俱居門下皆
以風力扇幹冠冕一時同升之美近代莫及元嘉三年
車駕征謝晦司徒王弘入居中書下省景仁長直共掌
留任晦乎代到彥之為中領軍侍中如故文帝所生章
太后早亡上奉太后所生蘇氏甚謹六年蘇氏卒車駕
親往臨哭詔遵二漢推恩之典景仁議以為漢氏推恩
加爵于時承秦之弊儒術蔑如懼非盛明所宜軌蹈晉
監二代朝政之所因君舉必書哲王之所慎體至公者
懸爵賞於無私奉天統者每屈情以申制所以作孚萬

國貽則後昆。一從之。丁母憂。葬竟起為領軍將軍。固辭。上使綱紀代。遣中書舍人周起輿載還府。服闋。遷尚書僕射。太子無事。劉湛代為領軍。湛與景仁素善。初皆被遇於武帝。日以宰相許之。湛嘗居外任。會王弘王華王曇首相繼亡。景仁引湛還朝。共參朝政。湛既入。以景仁位遇本不踰己。而一旦居前。意甚憤憤。知文帝信仗景仁。不可移奪。乃深結司徒彭城王義康。欲倚宰相之重。以傾之。十二年。景仁遷中書令。護軍將軍僕射如故。尋復加領吏部。湛愈怒。義康納湛言。毀景仁於帝。帝

益隆景仁。密陳相王權重。非社稷計。上以為然。景仁對親舊。歎曰。引之令入。入便噬人。乃稱疾解職。表疏累上。不見許。使停家養病。湛議欲遣人若劫盜者於外殺之。以為文帝雖知當不能傷至親之愛。上微聞之。徙景仁於西掖門外。晉鄱陽王第。以為護軍府。密通宮禁。故其計不行。景仁卧疾者五年。雖不見上。而密函去來。日中以十數。朝政大小。必以問焉。影迹周密。莫有窺其際者。及將收湛之日。景仁便拂拭衣冠。寢疾既久。左右皆不悟其意。其夜上出華林園。延賢堂召景仁。景仁猶稱

脚疾小牀輿以就坐誅討虜分一皆委之代義康為揚
州刺史僕射吏部如故遣使者授印綬主簿代拜拜畢
便覺疾甚情理乖錯性本寬厚而忽更苛暴問左右曰
今年男婚多女嫁多是冬大雪景仁乘輿出聽事觀望
忽驚曰當閣何得有大樹既而曰我誤耳疾篤文帝謂
不利在州使還任僕射下省為州凡月餘日卒或云見
劉湛為崇追贈侍中司空謚曰文成公大明五年孝武
行經景仁墓詔遣致祭了道矜幼而不慧位太中大夫
道矜子恒明帝時位侍中度支尚書屬父疾積久為者

司所奏詔曰道矜生便有病更無橫疾恒因愚習惰久
妨清序可除散騎常侍景仁從祖弟淳字粹遠祖允晉
太常父穆以和謹致稱自五兵尚書為武帝相國左長
史元嘉中位特進右光祿大夫始興王師卒謚曰元淳
少好學有美名歷中書黃門侍郎黃門清切直下應留
下省以父老特聽還家高簡寡欲早有清尚愛好文義
未嘗違捨在祕書閣撰四部書大目凡四十卷行於世
元嘉十一年卒朝廷痛惜之子孚有父風嘗與侍中何
勗共食孚羹盡勗云益殷尊羹勗司空無忌子也孚徐

輟筋曰何無忌諱字位吏部郎為順帝撫軍長史子臻
字後同幼有名行表粲褚淵並賞異之每造二公之席
輒清言畢景王儉為丹楊尹引為郡丞表昂先拜祕書
丞求臻為到省表臻荅曰何不見倩拜而見倩作表遂
不為作歷位太子洗馬淳弟冲字希遠位御史中丞有
司直之稱再遷度支尚書元凶妃即淳女而冲在東宮
為劾所知遇劾弒立以為司隸校尉冲有學義文辭劾
便尚書符罪狀孝武亦為劾盡力建鄴平賜死冲弟淡
字莫遠亦歷黃門吏部郎太子中庶子大明中又以文

章見知

列傳第四十六

通志一百三十三

